

25/10/1998

Habibie diminta lebih sensitif

Nazar Abdul in Jakarta

JAKARTA: Seorang pemerhati politik Universiti Indonesia, Maswadi Rauf, berkata kenyataan Presiden B J Habibie terhadap kes bekas Timbalan Perdana Menteri, Datuk Seri Anwar Ibrahim tidak tepat dan tidak sesuai dengan etika politik dan tradisi Asean.

Menurutnya, selama ini pemimpin negara Asean sangat berhati-hati dan sering menghindar daripada campur tangan dalam urusan negara anggota pertubuhan serantau itu.

Menurutnya, tidak wajar bagi Habibie untuk membuat kenyataan atau ulasan terhadap perkembangan politik di Malaysia, lebih-lebih lagi membabitkan Perdana Menteri, Datuk Seri Dr Mahathir Mohamad dan Anwar.

"Kita tidak belum tahu pihak mana yang benar (merujuk kepada tuduhan terhadap Anwar yang terbabit dalam kes rasuah dan salah laku seks).

"Dalam hal ini memang tidak wajar Habibie membuat kenyataan yang memihak kepada salah seorang tokoh itu.

"Jika kita diperlakukan seperti itu tentu kita juga marah," katanya dipetik sebagai berkata dalam akhbar Harian Terbit, semalam.

Habibie sebelum ini mengkritik pihak berkuasa Malaysia kerana didakwa tidak memberi layanan baik kepada Anwar yang ditahan atas tuduhan rasuah dan salah laku seks.

Maswadi yang mengulas hubungan semasa Kuala Lumpur - Jakarta berkata, ada banyak perbezaan di kalangan negara anggota Asean, tetapi pemimpin pertubuhan itu selalu menahan diri untuk mempertahankan tradisi politik masing-masing.

Katanya, hubungan Malaysia-Indonesia tetap erat tetapi penuh dengan sentimen.

Sehubungan itu, katanya, kedua-dua negara sebaik-baiknya tidak membangkitkan luka lama.

Selain itu, pada masa ini beribu-ribu rakyat Indonesia bekerja di Malaysia dan mereka membawa pulang banyak tukaran wang asing untuk negara.

Maswadi turut menyarankan supaya Habibie memberi penjelasan kepada Dr Mahathir mengenai kenyataannya mengenai Anwar.

Beliau berpendapat adalah lebih baik dan menguntungkan jika Habibie dapat membuat penjelasan baru mengenai perkara itu kepada Dr Mahathir.

(END)